

सिरि उस्सहदेव सामिस्स णमो । सिरि गोडी - जिराउला - सब्बोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम-सोहम्माइ सब्ब गणहराणं णमो । सिरि सुगुरु-देवाणं णमो । **आवस्सयं पढमं मूलसुत्तं पढमं अज्झयणं-सामाइयं १)** नमो अरहंताणं नमो सिद्धाणं नमो आयरियाणं नमो उवज्झायाणं नमो लोए सब्बसाहूणं एसो पंच नमुक्कारो सब्ब पावप्पणासणो मंगलाणं च सब्बेसिं पढमं होइ (हवइ) मंगलं (अ०४) आगममंजुषा पृ. १२०५ ।१-१। २) करेमि भंते सामाइयं-सब्बं सावज्जं जोगं पच्चक्खामि जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि तस्स भंते पडिक्कमामि निंदामि गरिहामि अप्पाणं वोसिरामि ।१। **★★★ पढमं अज्झयणं समत्तं बीयं अज्झयणं-चउवीसत्थओ ★★★** ३) लोगस्स उज्जोयगरे धम्मतित्थयरे जिणे अरिहंते कित्तइस्सं चउवीसंपि केवली ॥१॥ ४) उस्सभमजियं च वंदे संभवमभिणंदणं च सुमइं च पउमप्पहं सुपासं जिणं च चंदप्पहं वंदे ॥२॥ ५) सुविहिं च पुप्फदंतं सीअल सिज्जंस वासुपुज्जं च विमलमणंतं च जिणं धम्मं संतिं च वंदामि ॥३॥ ६) कुंथुं अरं च मल्लिं वंदे मुणिसुब्बयं नमिजिणं च वंदामि रिट्ठेनेमि पासं तह वद्धमाणं च ॥४॥ ७) एवं मए अभिथुआ विहुय - रयमला पहीण-जरमरणा चउवीसंपि जिणवरा तित्थयरा मे पसीयंतु ॥५॥ ८) कित्तिय वंदिय महिया जेए लोगस्स उत्तमा सिद्धा आरुग्ग-बोहिलाभं समाहिवरमुत्तमं दिंतु ॥६॥ ९) चंदेसु निम्मलयर आइच्चेसु अहियं पयासयरा सागरवरगंभीरा सिद्धा सिद्धिं मम दिसंतु ॥७॥ **★★★ बीयं-अज्झयणं-समत्तं ★★★ तइयं अज्झयणं-वंदणयं ★★★** १०) इच्छामि खमासमणो वंदितुं जावणिज्जाए निसीहियाए, अणुजाणह मे मिउग्गहं निसीहि अहोकायं काय-संफासं खमणिज्जो भे किलामो, अप्पकिलंताणं बहुसुभेण भे दिवसो वइक्कंतो जत्ता भे जवणिज्जं च भे, खासेमि खमासमणो देवसियं वइक्कमं आवस्सियाए पडिक्कमामि खमासमणाणं देवसियाए आसायणाए तित्तीसन्नयरए जं किंचि मिच्छाए मणदुक्कडाय वयदुक्कडाए कायदुक्कडाए कोहाए माणाए मायाए लोभाए सब्बकालियाए सब्बमिच्छोवयाराए सब्बधम्माइक्कमणाए आसायणाए जो मे अइयारो कओ तस्स खमासमणो पडिक्कमामि निंदामि गरिहामि अप्पाणं वोसिरामि ।२। **★★★ तइयं अज्झयणं समत्तं ★★★ चउत्थं अज्झयणं - ★★★** पडिक्कमणं नमो अरिहंताणं नमो सिद्धाणं नमो आयरियाणं नमो उवज्झायाणं नमो लोए सब्बसाहूणं एसो पंच नमुक्कारो सब्ब पावप्पणासणो मंगलाणं च सब्बेसिं पढमं होइ (हवइ) मंगलं अ ० ८ करेमि भंते सामाइय-सब्बं सावज्जं जोगं पच्चक्खामि जावज्जीवाए तिविहं तिविहेणंमणेणं वायाए काएणं न करेमि न कारवेमि करंतं पि अन्नं न समणुजाणामि तस्स भंते पडिक्कमामि निंदामि गरिहामि अप्पाणं वोसिरामि ।३-१। १२) चत्तारि मंगलं अरहंता मंगलं सिद्धा मंगलं साहू मंगलं केवलिपन्नत्तो धम्मो मंगलं ।३। १३) चत्तारि लोगुत्तमा अरहंता लोगुत्तमा सिद्धा लोगुत्तमा साहू लोगुत्तमा केवलिपन्नत्तो धम्मो लोगुत्तमो ।४। १४) चत्तारि सरणं पवज्जामि अरहंते सरणं पवज्जामि सिद्धे सरणं पवज्जामि साहू सरणं पवज्जामि केवलिपन्नत्तं धम्मं सरणं पवज्जामि ।५। सू-१ १५) इच्छामि पडिक्कमिउं जो मे देवसिओ अइयारो कओ काइओ वाइओ माणसिओ उस्सुत्ता उम्मग्गो अकप्पो अकरणिज्जो दुज्झाओ दुव्विचिंतित्तो अणायारो अणिच्छियव्वो असमणपाउग्गो नाणे दंसणे चरित्ते सुए सामाइए तिणहंगुत्तीणं चउण्हं कसायाणं पंचण्हंमहव्वयाणं छण्हंजीवनिकायाणं सत्तण्हं पिंडेसणाणं अट्ठण्हं पवयणमारुणं नवण्हं बंभचेरगुत्तीणं दसविहे समणधम्मो समणाणं जोगाणं जं खंडियं जं विराहियं तस्स मिच्छा मि दुक्कडं ।६। सू. २ १६) इच्छामि पडिक्कमिउं इरियावहियाए विराहणाए गमणागमणे पाणक्कमणे बीयक्कमणे हरियक्कमणे ओसा-उत्तिंग-पणग-दगमट्टी-मक्कडासंताणासंकमणे जे मे जीवा विहाहिया एगिंदिया बेइंदिया तेइंदिया चउरिंदिया पंचिंदिया अभिहया वत्तिया लेसिया संघाइया संघट्टिया परियाविया किलामिया उद्विया ठाणाओ ठाणं संकामिया

सौजन्य :- प.पू. साध्वीश्री अक्षयगुलाश्रीशु म.सा. नी प्रेरणाथी श्री रामाणिया जैन संघ (६२७)

जीवियाओ ववरोविया तस्स मिच्छा मि दुक्कडं ।७। सू.३ १७) इच्छामि पडिक्कमिउं पगामसिज्जाए निगामसिज्जाए संथारा उव्वट्टणाए परियट्टणाए आउंटण पसारणाए छप्पइयसंघट्टणाए कूइए कक्कराइए छीए जंभाइए आमोसे ससरक्खामोसे आउलमाउलाएसोअणवत्तियाएइत्थीविप्परिआसियाएदिट्ठिविप्परि आसिआएमणविप्परिआसिआए पाणभोयणविप्परि आसि आएजोमेदेवसिओ अइयारोकओतस्समिच्छिमिदुक्कडं ।८।सू-४। १८) पडिक्कमामि गोयरचरिआए भिक्खायरिआए उग्घाडकवाडउग्घाडणाए साणावच्छा-दारसंघट्टणाए मंडी-पाहुडियाए बलि-पाहुडियाए ठवणा-पाहुडियाए संकिए सहसागारे अणेसणाए (पाणे सणाए) पाणभोयणाए बीयभोयणाए हरियभोयणाए पच्छाकम्मियाए पुरेकम्मियाए अदिट्ठहडाए दग-संसट्ठहडाए रय-संसट्ठहडाए परिसाडणियाए पारिट्ठावणियाए ओहासणभिक्खाए जं उग्गमेणं उप्पायणेसणाए अपरिसुद्धं परिग्गहियं परिभुत्तं वा जं न परिट्ठवियं तस्स मिच्छा मि दुक्कडं ।९।सू-५। १९) पडिक्कमामि चाउक्कालं सज्झायस्स अकरणयाए उभओकालं भंडोवगरणस्स अप्पडिलेहणाए दुप्पडिलेहणाए अप्पमज्जणाए दुप्पमज्जणाए अइक्कमे वइक्कमे अइयारे अणायारे जो मे देवसिओ अइयारो कओ तस्स मिच्छा मि दुक्कडं ।१।सू-६। २०) पडिक्कमामि एगविहे असंजमे, पडिक्कमामि दोहिं बंधणेहिं-रागबंधणेणं दोसबंधणेणं, पडिक्कमामि तिहिं गुत्तीहिंमणगुत्तीए वइगुत्तीए कायगुत्तीए ।११।सू-६। २१) पडिक्कमामि तिहिं सल्लेहिं-मायासल्लेणं निआणसल्लेणं मिच्छादंसणसल्लेणं, पडिक्क-मामि तिहिं गारवेहिं-इड्ढीगारवेणं रसगारवेणं सायागारवेणं, पडिक्कमामि तिहिं विराहणाहिं-नाणविराहणाए दंसणविराहणाए चरित्तविराहणाए, पडिक्कमामि चउहिं कसाएहिंकोहकसाएणं माणकसाएणं मायाकसाएणं लोभकसाएणं, पडिक्कमामि चउहिं सण्णाहिंआहारसण्णाए भयसण्णाए मेहुणसण्णाए परिग्गहसण्णाए, पडिक्कमामि चउहिं विकहाहिइत्थिकहाए भत्तकहाए देसकहाए रायकहाए, पडिक्कमामि चउहिं ज्ञाणेहिं-अट्टेणं ज्ञाणेणं रुद्धेणं ज्ञाणेणं धम्मेणं ज्ञाणेणं सुक्केणं ज्ञाणेणं ।१२।सू-७। २१) पडिक्कमामि पंचहिं किरियाहिं काइयाए अहिगरणियाए पाउसियाए पारितावणियाए पाणाइवायकिरियाए ।१३।सू-८। २३) पडिक्कमामि पंचहिं कामगुणेहिं-सद्धेणं रुवेणं गंधेणं रसेणं फासेणं, पडिक्कमामि पंचहिं महव्वएहिं-पाणाइवायाओ वेरमणं मुसावायाओ वेरमणं अदिन्नादाणाओ वेरमणं मेहुणाओ वेरमणं परिग्गहाओ वेरमणं, पडिक्कमामि पंचहिं समईहिं-इरियासर्मिइए भासासिमिईए एसणासमिईए आयाणभंडमत्तनिक्खेवणासमिईए उच्चार-पासवण-खेल-सिंघाण-जल्ल-पारिट्ठा-वणियासमिईए ।१४।सू-९। २४) पडिक्कमामि छहिं जीवनिकाएहिं-पुढविकाएणं आउकाएणं तेउकाएणं वाउकाएणं वणस्सइकाएणं तसकाएणं, पडिक्कमामि छहिं लेसाहिं किणहलेसाए नीललेसाए काउलेसाए तेउलेसाए पम्हलेसाए सुक्कलेसाए, पडिक्कमामि सत्तहिं भयट्टाणणेहिं, अट्टहिं मयट्टाणणेहिं, नवहिं बंभचेरगुत्तीहिं, दसविहे समणधम्मे, एक्कारसहिं उवासगपडिमाहिं, बारसहिं भिक्खुपडिमाहिं, तेरसहिं किरियाट्टाणेहिं ।१५।सू-१०। २५) चउदसहिं भूयगामेहिं, पन्नरसहिं परमाहम्मिएहिं, सोलसहिं गाहासोलसएहिं, सत्तरसविहे असंजमे, अट्टारसविहे अबंभे, एगूणवीसाए नायज्झयणेहिं, वीसाए असमाहिट्टाणेहिं ।१६।सू-११। २६) एगवीसाएसबलेहिं, बावीसाएपरीसहेहिं, तेवीसाएसुयगडज्झयणेहिं, चउवीसाए देवेहिं, पंचवीसाएभावणाहिं, छव्वीसाएदसाकप्पववहारणंउद्देसणकालेहिं, सत्तावीसाएअणगारगुणेहिं अट्टावीसइविहेआयारपकप्पेहिं, एगुणतीसाएपावसुयपसंगेहिं, तीसाएमोहणीयट्टाणेहिं एगतीसाए सिद्धाइगुणेहिं, बत्तीसाए जोगसंगेहेहिं ।१७।सू-१२। २७) तेत्तीसाए आसायणाहिं ।१८।सू-१३। २८) अरिहंताणंआसायणाए सिद्धाणंआसायणाए आयरियाणंआसायणाए उवज्झायाणं आसायणाए साहूणं आसायणाए साहुणीणंआसायणाए सावयाणंआसायणाए सावियाणं आसायणाए देवाणं आसायणाए देवीणंआसायणाए इहलोगस्सआसायणाए परलोगस्स - आसायणाए के वलिपन्नत्तस्सधम्मस्सआसायाणाए सदेवमणुयासुरस्सलोगस्सआसायणाए सव्वपाणभूयजीवसत्ताणंआसायणाए कालस्सआसायणाए सुयस्सआसायणाए सुयदेवयाए आसायणाए वायणायरियस्सआसायणाए ।१९।सू-१४। २९) जं वाइद्धं वच्चोमेलियं हीणक्खरं अच्चक्खरं पयहीणं विणयहीणं घोसहीणं जोगहीणं सुट्ठुदिच्चं दुट्ठुपडिच्छियं अकालेकओसज्झाओ कालेनकओसज्झाओ असज्झाइएसज्झाइयं सज्झाइनसज्झाइयं तस्स मिच्छा मि दुक्कडं ।२०।सू-१५। ३०) नमो चउव्वीसाए तित्थगराणं

उसभादिमहावीरपुज्जवसाणाणं ।२१।सू-१६। ३१) इणमेव निग्गंथं पावयणं सच्चं अनुत्तरं केवलियं पडिपुत्ते नेआउयं संसुद्धं सल्लगत्तणं सिद्धिमग्गं मुत्तिमग्गं निज्जाणमग्गं निव्वाणमग्गं अवितहमविसंधि सव्वदुक्खप्पहीणमग्गं इत्थं ठिया जीवा सिज्झंति बुज्झंति मुच्चंति परिनिव्वायंति सव्वदुक्खाणं अंतंकरंति ।२२।सू-१७। ३२) तं धम्मं सद्वहामि पत्तियामि रोएमि फासेमि पालेमि अनुपालेमि तं धम्मं सद्वहंतो पत्तियंतो रोएंतो फासेंतो पालंतो अनुपालंतो तस्स धम्मस्स केवलि पन्नत्तस्स अब्भुट्ठिओमि आराहणाए विरओमि विराहणाए - असंजमं परियाणामि संजमं उवसंपज्जामि अबंभं परियाणामि बंभ उवसंपज्जामि अकप्पं परियाणामि कप्पं उवसंपज्जामि अन्नाणं परियाणामि नाणं उवसंपज्जामि अकिरियं परियाणामि किरियं उवसंपज्जामि मिच्छत्तं परियाणामि सम्मत्तं उवसंपज्जामि अबोहिं परियाणामि बोहिं उवसंपज्जामि अमग्गं परियाणामि मग्गं उवसंपज्जामि ।२३।सू-१८। ३३) जं संभरामि जं च न संभरामि, जं पडिक्कमामि जं च न पडिक्कमामि, तस्स सव्वस्स देवसियस्स अइयारस्स पडिक्कमामि समणोहं संजय-विरय-पडियह-पच्चक्खाय-पावकम्मो अनियाणो दिट्ठिसंपन्नो मायामोसविवज्जओ ।२४।सू-१९। ३४) अइढाइज्जेसु दीवसमुद्देसु पन्नरससु कम्मभूमीसु जावंत केई साहू रयहरण-गुच्छपडिग्गहधरा पंचमहव्वयधरा अट्टारस सहस्स सीलंग धरा अक्खयायारचरित्ता ते सव्वे सिरसा मणसा मत्थएण वंदामि ।२५।सू-२०। ३५) खामेमि सव्वजीवे सव्वे जीवा खमंतु मे मित्ती मे सव्वभूएसु वेरं मज्झ न केणई ।।८।-१ ३६) एवमहं आलोइय निंदिय गरिहिय दुगंछिय सम्मं तिविहेण पडिक्कंतो वंदामि जिणे चउवीसं ।।९।-२ ☆☆☆ चउत्थं अज्झयणं समत्तं पंचमं अज्झयणं - काउस्सग्गो ☆☆☆ ३७) करेमि भंते सामाइयं-सव्वं सावज्जं जोगं पच्चक्खामि जावज्जीवाए तिविहं तिविहेणं मणेणं वायाए काएणं न करेमि न कारवेमि करंतं पि अन्नं न समणुजाणामि तस्स भंते पडिक्कमामि निंदामि गरिहामि अप्पाणं वोसिरामि ।२६-१। ३८) इच्छामि ठाइउं काउस्सग्गं जो मे देवासिओ अइयारो कओ काइओ वाइओ माणसिओ उस्सुत्तो उम्मग्गो अकप्पो अकरणिज्जो दुज्झाओ दुव्विचिंतिओ अणायारो अणिच्छियव्वो असमणपाउग्गो नाणे दंसणे चरित्ते सुए सामाइए तिण्हंगुत्तीणं चउण्हंकसायाणं पंचण्हं महव्वयाणं छण्हंजीवनिकायाणं सत्तण्हंपिंडेसणाणं अट्टण्हंपवयणमाऊणं नवण्हंबंभचेरगुत्तीणं दसविहेसमणधम्मे समणाणं जोगाणं जं खंडियं जं विराहयं तस्स मिच्छा मि दुक्कडं ।२६।सूत्र-१। ३९) तस्स उत्तरीकरणेणं पायच्छित्तकरणेणं विसोहीकरणेणं विसल्लीकरणेणं पावाणं कम्माणं निग्घायणट्टाए ठामि काउस्सग्गं अन्नत्थ ऊससिएणं नीससिएणं खासिएणं छीएणं जंभाइएणं उड्डुएणं वायनिसग्गेणं भमलीए पित्तमुच्छाए सुहेमिहिं अंगसंचालेहिं सुहूमेहिं खेलसंचालेहिं सुहेमेहिं दिट्ठिसंचालेहिं एवमाइएहिं आगारेहिं अभग्गो अविराहिओ हुज्ज मे काउस्सग्गो जाव अरिहंताणं भगवंताणं नमुक्कारेणं न पारेमि तावकायं ठाणेणं मोणेणं झाणेणं अप्पाणं वोसिरामि ।२७।सूत्र-२। ४०) लोगस्स उज्जोयगरे धम्मतित्थयरे जिणे अरिहंते कित्तइस्सं चउवीसंपि केवली ।।२९.१। ४१) उसभमजियं च वंदे संभवमभिनंदणं च सुमइं च पुसप्पहं सुपासं जिणं च चंदप्पहं वंदे ।।२९.२। ४२) सुविहिं च पुप्फदंतं सीअल सिज्जंस वासुपुज्जं च विमलमणंतं च जिणं धम्मं संतिं च वंदामि ।।२९.३। ४३) कुंथुं अरं च मल्लिं वंदे मुणिसुव्वयं नमिजिणं च वंदामि रिट्ठनेमिं पासं तह वद्धमाणं च ।।२९.४। ४४) एवं मए अभिथुआ विहुय-रयमला पहीण-जरमरणा चउवीसंपि जिणवरा तित्थयरा मे पसीयंतु ।।२९.५। ४५) कित्तिय वंदिय महिया जेए लोगस्स उत्तमा सिद्धा आरु ग्ग-बोहिलाभं समाहिवरमुत्तमं दिंतु ।।२९.६। ४६) चंदेसु निम्मलयरा आइच्चेसु अहियं पयासयरा सागरवरगंभीरा सिद्धा सिद्धिं मम दिसंतु ।।२९.७। ४७) सव्वलोए अरहंतं चेइयाणं करेमि काउस्सग्गं वंदणवत्तियाए पूअणवत्तियाए सक्कारवत्तियाए सम्माणवत्तियाए बोहिलाभवत्तियाए निरुवसग्गवत्तियाए स द्धाए मेहाए धिईए धारणाए अणुप्पेहाए वड्ढमाणीए ठामि काउस्सग्गं (अन्नत्थ०) ।२८।सूत्र-३। ४८) पुक्खरवरदीवड्ढे धायइसंडे य जंबुदीवे य भरहेरवय विदेहे धम्माइगरे नमंसामि ।।३०।-१ ४९) तमतिमिरपडल विद्धंसणस्स सुरगणनरिंदमहियस्स सीमाधरस्स वंदे पप्फोडियमोहजालस्स ।।३१।-२ ५०) जाईजरामरण सोग पणासणस्स, कल्लाणपुक्खल विसालसुहावहस्स कोदेवदानवरिंदगणच्चिअस्स, धम्मस्ससारमुवलब्भकरे पमायं ।।३२।३

५१) सिद्ध भो पयओ नमो जिणमए नंदी सया संजमे देवं नाग सुवण्णकिन्नरगण स्सब्भूअ भावच्चिए लागो जत्थ पइट्ठिओ जगमिणं तेलुक्कमच्चासुरं धम्मो वड्ढउ सासओ विजयओ धम्मत्तरं वड्ढउ ॥१३॥-४ ५२) सुअस्स भगवओ करेमि काउस्सग्गं वंदणं ० अन्नत्थ ० ॥२९॥सूत्र-४ ५३) सिद्धाणं बुद्धाणं पारगयाणं परंपर गयाणं लोअग्गमुवगयाणं नमो सया सव्वसिद्धाणं ॥१४॥-१ ५४) जो देवाण वि देवो जं देवा पंजली नमंसंति तं देवदेवमहियं सिरसा वंद महावीरं ॥१५॥-२ ५५) इक्कोवि नमुक्कारो जिणवरवसहस्स वद्धमाणस्स संसार सागराओ तारेइ नरं व नारिं वा ॥१६॥-३ ५६) उज्जिंतसेल सिहरे दिक्खा नाणं निसीहिआ जस्स तं धम्मचक्कवट्ठीं अरिट्ठनेमिं नमंसामि ॥१७॥-४ ५७) चत्तारि अट्ठदस दो य वंदिआ जिणवरा चउव्वीसं परमट्ठ निट्ठिअट्ठा सिद्धा सिद्धिं मम दिसंतु ॥१८॥-५ (इति सुयथव - सिद्धथव गाहाओ) ॥३०॥ ५८) इच्छामि खमासमणो पिअं च भे जं मे हट्ठाणं तुट्ठाणं अप्पायं काणं अभग्गजोगाणं सुसीलाणं सुव्वयाणं सायरिय उवज्झायाणं नाणेणं दंसणेणं चरित्तेणं तवसा अप्पाणं भावेमाणाणं बहुसुभेणं भे दिवसो पोसहो पक्खो वइक्कंतो अन्नो य भे कल्लालेणं पज्जुवट्ठिओ सिरसा मणसा मत्थएण वंदामि - तुब्भेहिं समं ॥३२॥ सूत्र-५ ६०) इच्छामि खमासमणो पुव्विं चेइयाइं वंदित्ता नमंसित्ता तुब्भण्हं पायमूलं विहरमाणेणं जे केई बहु देवसिया साहुणो दिट्ठा समाणा वा वसमाणा वा गामाणुगामं दूइज्जमाणा वा राइणिया संपुच्छंति ओमराइणिया वंदंति अज्जया वंदंति अज्जियाओ वंदंति सावया वंदंति सावियाओ वंदंति अहंपि निसल्लो निक्कसाओत्ति-कट्ठु सिरसा मणसा मत्थएण वंदामि - अहमवि वंदावेमि चेइयाइं ॥३३॥सूत्र-६ ६१) इच्छामि समासमणे उवट्ठिओ मि तुब्भण्हं संतिअं अहाकप्पं वा वत्थं वा पडिग्गहं वा कंबलं वा पायपुच्छणं वा (रयहरणं वा) अक्खरं वा पयं वा गाहं वा सिलोगं वा सिलोगद्धं वा अट्ठं वा हेउं वा पसिणं वा वागरणं वा तुब्भेहिं सम्मं चित्तेण दिन्नं मए अविणएण पडिच्छिअं तस्स मिच्छामिदुक्कडं - आयरियसंतिअं ॥३४॥सूत्र-७ ६२) इच्छामि खमासमणो अहमपुव्वाइं कयाइं च मे किइ कम्माइं आयरमंतरे विणयमंतरे सेहिए सेहाविओ संगहिओ उवग्गहिओ सारिओ वारिओ चोइओ पडिचोइओ चित्ता मे पडिचोयणा उव्वट्ठिओहं तुब्भण्हं तवतेयसिरीए इमाओ चाउरंतसंसारकंताराओ साहट्ठु नित्थरिस्सामि त्तिकट्ठु सिरसामणसा मत्थएण वंदामि - नित्थारगपारगाहोह ॥३५॥

☆☆☆ सूत्र-८ पंचमं अज्झयणं समत्तं छट्ठं अज्झयणं - पच्चक्खाणं ☆☆☆ ६३) तत्थ समणोवासओ पुव्वामेव मिच्छत्ताओ पडिक्कमइ सम्मत्तं उवसंपज्जइ नो से कप्पइ अज्जप्पभिई अन्नउत्थिए वा अन्नउत्थिएअदेवयाणि वा अन्नउत्थियपरिग्गहियाणी वा अरिहंतचेइयाणि वा वंदित्तेण वा नमंसित्तेण वा पुव्वि अणालत्तएणं आलवित्तेण वा संलवित्तेण वा तेसिं असणं वा पाणं वा खाइमं वा साइमं वा दाउं वा अनुप्पयाउं वा नन्नत्थ रायाभिओगेणं गणाभिओगेणं बलाभिओगेणं देवयभिओगेणं गुरुनिग्गहेणं वित्तीकंतारेणं से य सम्मत्ते पसत्थसमत्तमोहणियकम्माणुवेयणोवसमखयसमुत्थे पसमसंवेगाइलिंगे सुहे आयपरिणामे पन्नत्ते सम्मत्तस्स समणोवासएणं इमे पंच अइयाया जाणियव्वा न समायरियव्वा तं जहा-संका कंखा वितिगिच्छा परपासंडपसंसा परपासंडसंथवे ॥३६॥सूत्र-१ ६४) थूलगपाणाइवायं समणोवासओ पच्चक्खाइ से पाणाइवाए दुविहे पन्नत्तं तं जहासंकप्पओ अ आरंभओ अ तत्थ समणोवासओ संकप्पओ जावज्जीवाए पच्चक्खाइ नो आरंभओ थूलगपाणाइवायवेरमणस्स समणोवासएणं इमे पंच अइयारा जाणियव्वा तं जहा-बंधे वहे छविच्छेए अइभारे भत्तपाणवुच्छेए ॥३७॥सूत्र-१ ६५) थूलगमुसावायं समणोवासओ पच्चक्खाइ से य मुसावाए पंचविहे पन्नत्ते तं जहाकन्नालीए गवालीए भोमालीए नासावहारे कूडसक्खिज्जे, थूलगमुसावायवेरमणस्स समणोवासएणं इमे पंच अइयारा जाणियव्वा तं जहा-सहस्सब्भक्खाणे रहस्सब्भक्खाणे सदारमंतभेए मोसुवएसे कूडलेहकरणे ॥३८॥सूत्र-२ ६६) थूलगअदत्तादानं समणोवासओ पच्चक्खाइ से अदिन्नावाणे दुविहे पन्नत्ते तं जहा सचित्तादत्तादाने अचित्तादत्तादाने अ, थूलादत्तादानवेरमणस्स समणोवासएणं इमे पंच अइयारा जाणियव्वा तं जहा तेनाहडे तक्करपओगे विरुद्धज्जाइंक्कमणे कूडतुलकूडमाणे तप्पडिरुवगवहारे ॥३९॥सूत्र-४ ६७) परदारगमणं समणोवासओ पच्चक्खाइ सदारसंतोसं वा पडिवज्जइ से य परदारगमणे दुविहे पन्नत्ते तं जहा-ओरालियपरदारगमणे वेउव्वियपरदारगमणे सदारसंतोस्स समणोवासएणं इमे पंच अइयारा जाणियव्वा तं जहा-

अपरिगहियागमणे इत्तरियपरिगहियागमणे अनंगकीडा परवीवाहकरणे कामभोगतिव्वाभिलासे ।४०। सूत्र-४। ६८) अपरिमियपरिग्गहं समणोवासओ पच्चक्खाइ इच्छापरिमाणं उवसपंज्जइ से परिग्गहे दुविहे पन्नत्ते तं जहा-सचित्तपरिग्गहे अचित्तपरिग्गहे य, इच्छापरिमाणस्स समणोवासएणं इमे पंच अइयारा जाणियव्वा तं जहा-धणधन्नपमाणाइक्कमे खित्तवत्थुपमाणाइक्कमे हिरन्नसुवन्नपमाणा-इक्कमे दुपयचउप्पयपमाणाइक्कमे कुवियपमाणाइक्कमे ।४१।सूत्र-६। ६९) दिसिवए तिविहे पन्नत्ते-उड्ढदिसिवए अहोदिसिवए तिरियदिसिवए दिसिवयस्स समणोवासएणं इमे पंच अइयारा जाणियव्वा तं जहा-उड्ढदिसिपमाणाइक्कमे अहोदिसिपमाणाइक्कमे तिरियदिसिपमाणाइक्कमे खित्तुवुड्ढी सइअंतरद्धा ।४२।सूत्र-६। ७०) उवभोगपरिभोगवए दुविहे पन्नत्ते तं जहा-भोअणओ कम्मओ अ, भोअणओ समणोवासएणं इमे पंच अइयारा जाणियव्वा तं जहा-सचित्ताहारे सचित्तपडिबद्धाहारे अप्पउलिओसहिभक्खणया तुच्छोसहिभक्खणया दुप्पउलिओसहिभक्खणया ।४३।सूत्र-७। ७१) कम्मओ णं सममोवासएणं इमाइं पन्नरस कम्मादानाइं जाणियव्वाइं तं जहाइंगालकम्मे वणकम्मे साडीकम्मे भाडीकम्मे फोडीकम्मे दंतवाणिज्जे लक्खवाणिज्जे रसवाणिज्जे केसवाणिज्जे विसवाणिज्जे जंतपीलणकम्मे निल्लंछणकम्मे दवग्गिदावणया सरदहतलायसोसणया असईपोसणया ।४४।सूत्र-७। ७२) अनत्थदंडे चउव्विहे पन्नत्ते तं जहा-अवज्झाणारिए पमत्तायरिए हिंसप्पयाणे पावकम्मोवएसे अनत्थदंडवेरमणस्स समणोवासएणं इमे पंच अइयारा जाणियव्वा तं जहा-कंदप्पे कुक्कुइए मोहरिए संजुत्ताहिरणणे उवभोगपरिभोगाइरेगे ।४५।सूत्र-८। ७३) सामाइयं नामं सावज्जजोगपरिवज्जणं निरवज्जजोगपडिसेवणं च ॥४६-१। ७४) सिक्खा दुविहा गाहा उववायठिई गई कसाया य बंधंता वेयंता पडिवज्जाइक्कमे पंच ॥१९॥-१ ७५) सामाइअंमि उ कए समणो इव सावओ हवइ जम्हा एएणं कारणेणं बहुसो सामाइयं कुज्जा ॥२०॥-२ ७६) सव्वंति भाणिरुणं विरई खलु जस्स सव्विया नत्थि सो सव्वविरइवाई चुक्कइ देसं च सव्वं च ॥२१॥-३ ७७) सामाइयस्स समणोवासएणं इमे पंच अइयारा जाणियव्वा तं जहा-मणदुप्पणिहाणे वइदुप्पणिहाणे कायदुप्पणिहाणे सामाइयस्स सइअकरणया सामाइयस्स अणवट्टियस्स करणया ।४६।सूत्र-९। ७८) दिसिव्वयगहियस्स दिसापरिमाणस्स पइदिनं परिमाणकरणं देवावगासियं देवावगासियस्स समणोवासएणं इमे पंच अइयारा जाणियव्वा तं जहा-आणवणप्पओगे पेसवणप्पओगे सद्धानुवाए रुवाणुवाए बहिया पुग्गलपक्खेवे ।४७।सूत्र-१०। ७९) पोसहोववासे चउव्विहे पन्नत्ते तं जहा-आहारपोसहे सरीरसक्कारपोसहे बंभचेरपोसहे अवावारपोसहे, पोसहोववासस्स समणोवासएणं इमे पंच अइयारा जाणियव्वा तं जहाअप्पडिलेहिय-दुप्पडिलेहिय-सिज्जासंथारए अप्पमज्जिय-दुप्पमज्जिय-सिज्जासंथारए अप्पडिलेहियदुप्पडिलेहिय-उच्चारपासवणभूमीओ अप्पमज्जिय-दुप्पमज्जिय-उच्चारपासवणभूमीओ पोसहोववासस्स सम्मं अन्नपालणया ।४८।सूत्र-१। ८०) अतिहिंसविभागो नाम नायागयाणं कप्पणिज्जाणं अन्नपाणाईणं दव्वाणं देसकालसद्धा-सक्कारकमजुअं पराए भत्तीए आयाणुगहबुद्धीए संजयाणं दाणं, अतिहिंसविभागस्स समणोवसएणं इमे पंच अइयारा जाणियव्वा तं जहा-सच्चित्तनिक्खेवणया सच्चित्त-पिहणया कालाइक्कमे परवएसे मच्छरिया य ।४९।सूत्र-२। ८१) इत्थं पुण समणोवासगधम्ममे पंचाणुव्वयाइं तिन्नि गुणव्वयाइं आवकहियाइं चत्तारि सिक्खावयाइं इत्तरियाइं एयस्स पुणो समणोवासगधम्मस्स मूलवत्थु सम्मत्तं तं जहा-तं निसग्गेण वा अभिगमेणं वा पंच अइयारविसुद्धं अणुव्वय-गुणव्वयाइं च अभिग्गा अन्नेवि पडिमादओ विसेस करणजोगा ।सूत्र-३। अपच्छिमा मारणंतिया संलेहणाइसणाराहणया इमीसे समणोवासएणं इमे पंच अइयारा जाणियव्वा तं जहा-इहलोगासंसप्पओगे परलोगासंसप्पओगे जीविया-संसप्पओगे मरणासंसप्पओगे कामभोगासंसप्पओगे ।५०।सूत्र-४। ८२) सूरे उग्गए नमुक्कारसहियं पच्चक्खाइ चउव्विहं पि आहारं असणं पाणं खाइमं साइमं अन्नत्थणाभोगेणं सहसागारेणं वोसिरइ ५०-१।सूत्र-१। ८३) सूरे उग्गए नमुक्पोरिसिरसहियं पच्चक्खाइ चउव्विहं पि आहार-असणं पाणं खाइमं साइमं अन्नत्थणाभोगेणं सहसागारेणं पच्छन्नकालेणं दिसामोहेणं साहुवयणेणं सव्वसमाहिवत्तिआगारेणं वोसिरइ (५०-२) (सूत्र-२) ८४) सूरे उग्गए पुरिमइढं पच्चक्खाइं चउव्विहंपि आहारं-असणं पाणं खाइमं साइमं अन्नत्थणा भोगेणं सहसागारेणं पच्छन्नकालेणं दिसामोहेणं साहुवयणेणं महत्तरागारेणं सव्वसमाहिवत्ति आगारेणं वोसिरइ ।५०-३।सूत्र-३ ८५) एगासणं पच्चक्खाइ चउव्विहंपि आहारं असणं

पाणं खाइमं साइमं अन्नत्थणाभोगेणं सहसागारेणं सागारियागारेणं आउंटणपसारणेणं गुरु अब्भुट्टाणेणं पारिट्ठावणियागारेणं महत्तरागारेणं सव्वसमाहि वत्ति आगारेणं वोसिरइ १५०-४। सूत्र-४ ८६) एगट्टाणं पच्चक्खाइ चउव्विहंपि आहारं-असणं पाणं खाइमं साइमं अन्नत्थणा भोगेणं सहसागारेणं सागारियागारेणं आउंटण पसारेणं गुरुअब्भुट्टाणेणं पारिट्ठावणियागारेणं सव्वसमाहि वत्ति आगारेणं वोसिरइ १५०-५।सूत्र-५ ८७) आयंबिलं पच्चक्खाइ चउव्विहंपि आहारं-असणं पाणं खाइमं साइमं अन्नत्थणाभोगेणं सहसागारेणं पारिट्ठावणियागारेणं महत्तरागारेणं सव्वसमाहि वत्ति आगारेणं वोसिरइ १५०-७। सूत्र-७ ८८) सूरे उग्गए अभत्तट्ठं पच्चक्खाइ चउव्विहंपि आहारं-असणं पाणं खाइमं साइमं अन्नत्थणाभोगेणं सहसागारेणं पारिट्ठावणियागारेणं महत्तरागारेणं सव्वसमाहि वत्ति आगारेणं वोसिरइ १५०-७।सूत्र-७ ८९) दिवसचरिमं पच्चक्खाइ चउव्विहंपि आहारं-असणं पाणं खाइमं साइमं अन्नत्थणाभोगेणं सहसागारेणं महत्तरागारेणं सव्वसमाहि वत्तिआगारेणं वोसिरइ (५०-८) ९०) भवचरिमं पच्चक्खाइ, अन्नत्थणाभोगेणं सहसागारेणं महत्तरागारेणं सव्वसमाहि वत्ति-आगारेणं वोसिरइ १५०-९। ९१) अभिग्गहं पच्चक्खाइ चउव्विहंपि आहारं-असणं पाणं खाइमं साइमं अन्नत्थणाभोगेणं सहसागारेणं महत्तरागारेणं सव्वसमाहि वत्तिआगारेणं वोसिरइ (५०-१०) सूत्र-९ ९२) निव्विगइयं पच्चक्खाइ चउव्विहंपि आहारं - असणं पाणं खाइमं साइमं अन्नत्थणाभोगेणं सहसागारेणं लेवालेवेणं गिहत्थसंसट्ठेणं उक्खित्तविवेगेणं पडुच्चमक्खिएणं पारिट्ठावणियागारेणं महत्तरागारेणं सव्वसमाहि वत्ति आगारेणं वोसिरइ (५०-११) - (५०) ४०

卐卐卐 आवस्सयं

समत्तं पढमं मूलसुत्तं समत्तं 卐卐卐